

INUIT ATAQATIGIIT INATSISARTUNI



UKA2021/033

20. oktober 2021

Pipaluk Lynge Rasmussen

Aatsitassanut inatsisip allangortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: "Ingerlatanik inatsimmut ilaasunik suliarinninnermi isumannaallisaaneq, peqqisuseq, avatangiisit, pisuussutinik atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq". § 83-mi oqaasertaliusaaq "nunat tamat ileqqorisartaagaat pitsaasut" aamma "nunat tamat pitsaanerpaamik ileqqorisartaagaat, Kalaallit Nunaanni pissutsinut naleqqussagaq"-mut aamma allangortinneqassaaq. Taamaattoq misissueqqaarnissamut qinnuteqaatinik paasissutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaanik ilisimasaqalersinnaaqqullugit.

(Inatsisartunut ilaasortaq Mariane Paviasen, Inuit Ataqatigiit)

Siunnersuuteqartumut Mariane Paviasen, Inuit Ataqatigiinneersumut siullermik qujarusuppunga.

Inuit pinngortitallu akornanni ataqatigiinnerup pilersinneqarnissaanut, pingaarnarpaanngortinneqarnissaanut, piffissanngorpoq.

Piffissami sivisuallaami ingerlatseqatigiiffiit salliutinneqarnerannut isiginnaartuuvugut.

INUIT ATAQATIGIIT INATSIARTUNI



Namminersorlutik Oqartussat suliffeqarfissuarnut angisuunut qanoq pilersaaruteqarnerat pillugu tusaaneqarnissaq ilisimasaqarnissarlu akuunissamut pisariaqartitsinerup ilagiinnarpaa. Tamannalu ersersinneqartarpoq oqaasertalius-sanik allanngortitsinikkut, innuttaasunut nunatsinnillu atuuttussanut aammalu ulluinnarni atukkatsinnut naapertuuttunngortitsinikkut.

Neriuppunga inatsimmi taamatut oqaasertanik allanngineq inunnt tamaani najugaqartunut aammalu pinngortitamik atuisunut iluaqutaalerumaartoq. Eqqortuusinnaanngilaq tuaviupiluttumik akuersisarneq, taamaasilluni innuttaasut tusarniaanermi killissarititaasoq pillugu tusarneqanngitsoorlutik, taamatullu qanoq pisinnaatitaaffeqarnerlutik paasisaqanngitsoorlutik. Matumani allannguummi innuttaasut nuannaarutigisinnaalissavaat, Namminersorlutik Oqartussat innuttaminnik salliutsitsisussanngormata.

Siunnersuuteqartoq qujaffigaara, aammalu nuannaarlunga siunnersuut akuerseqataaffigalugu, suliaq Avatangiisinut Eqqissisimatitsinermullu Ataatsimiititaliamut aappassaaneerineqannginnermini suliarineqassasoq innersuussutigalugu.